

少師朱襄毅公督蜀疏草

少師朱襄毅公督蜀疏草卷之八

塘報戰敗攻永賊兵疏

欽差總督四川兼制湖廣荆岳鄖襄四府陝西漢中一  
府軍務策應緩急督理糧餉巡撫四川等處地方兵部  
左侍郎兼都察院右僉都御史臣朱燮元謹題爲水蘭  
復糾攻永官兵屢戰大勝據實塘報功次事據監軍副  
使李仙品僉事劉可訓知府鄭朝棟總兵李維新自天  
啓三年十月十七日起至閏十月初十日陸續塘報稱

本鎮自九月十二日親統大兵直抵河口菜豆寨聯營與盧僉事分定把截直逼龍塲一月有餘只待兵領十日之餉卽過河擒酋奈何各兵五日無米馬湖營兵鼓噪於本職之前衆稱銀米俱無餓死數多將何以殺賊諭之再四法不能禁各營每日餓死數人且運夫至營十日不能得到千難萬窘人人云再過二日無米定是餓死觸目委屬可憐除嚴行各將協同降苗楊順龍等把守沿河本職暫撤古蘭就諸軍之食等情十九日又據道鎮塘報據將官王懋官張邦紘等報稱探得水西

發頭目五人統兵七十餘營來與二酋云若官兵過河  
兩家都不好宜速分道暗渡包截烏鎮芒部陰助有兵  
找搭浮橋運糧於本月十三日分爲四路由尖山子三  
岔河高木頂官斗山包截大寨來攻永寧將把隘降將  
楊順龍父子并何應元等殺死又一路差賊目胡宗祿  
朱國政麻老虎阿什等由大壩長溪攻瀘衛出江門搶  
截糧道各洞寨降苗聞信各懷攜貳之心等情本職卽  
發張令張學禮領兵一千四百馬湖兵一千五百袁昌  
兵一千隨范繼道統領救援瀘衛及護糧運截殺大壩

各賊發兵應援各路相機併力擒拏本職統領親丁鎮  
營回鎮永寧以固根本二十一日據將官王懋官王弘  
化等塘報西兵每路萬餘蟻聚曉夜夾攻永城本職會  
同二道分布粗畢二十四日巳時據張令等報稱賊糾  
水潦洞寨及都長降苗俱復爲賊用勢甚猖獗今令等  
分作三路用計取勝令與張學禮爲先鋒吳一枝袁昌  
爲後應奮勇衝入賊營令親斬麻老虎首級張學禮擒  
殺阿什已死生擒蔡保等十五名僞將被殺七名令復  
箭射朱國政賊亂竄敗走投崖仆水死者塞川殺死數

多未割首級獲馬四匹槍二十枝奪回被擄婦女二口  
督陣官劉北斗被賊連殺三槍猶然力戰回營身死等  
情本職卽會二道將降民爲質父母家口移出趙壩分  
門固守又於城內摻獲奸細任二元等審係二酋發作  
內應當卽梟示訖本日午時賊馬步苗兵漫山遍野蜂  
擁殺至永寧城下時各將俱分把紅崖等隘城中止有  
兵三萬本職同李副使劉僉事鄭知府卽刻登陴曉諭  
各營大加懸賞鼓衆出城殺賊本職披掛率督親丁李  
棲鳳等殺出東門三軍見此無不以一當百叅將林兆

鼎張邦紘鄧懋官將官劉宗良胡明臣李仙德張冲霄  
劉必達劉天眷等領兵四門齊出銃砲弓弩傷賊甚多  
遵義營兵方虎一槍刺死僞先鋒大寨頭目歹兒各營  
斬功數多賊見勢難敵尋卽敗走我兵追殺三里恐有  
埋伏天晚撤兵奪獲衣甲馬匹無數賊上真武山屯劄  
一退石灰窰一退滴水崖本夜三更據夜不收報稱賊  
復聚落窩職傳令南岸中峯遵義馬建各營遶衝鋒殺  
手三千黎明聽令二十六日早又據塘兵費楚政報稱  
二酋同西兵未撤陰發勁手苗羿萬餘一伏落窩一伏

落郎口候官兵出卽來包截舊用誘敵之計等情鎮道計議賊旣伏以待我我當出奇以制之隨發叅將林兆鼎張邦紘等將官李仙景等一十八員親丁李維忠李棲鳳等十一名督陣官陳善策等十員守備周良材雷鳴春等二十四員各督所部當夜遶出兩酋伏賊之前一枝分兩路於後追殺二十七日早發張令等兵四千策應范繼道兵二千出清振司雞公寨旁出落窩之前俱聽大路砲響一齊殺出至二十八日五鼓銃響發喊前後截殺滾崖跌死數千生擒二十五名斬功數多另



報奪獲賊馬四十匹刀弩長槍二百五十餘件時值大霧昏黑未盡割級寨房焚燬光焰冲天老酋由新寨走脫小酋由蘭州逃遁降民周有富殺死樊虎頭人三名得盔甲一副等情該鎮道看得是役也殲賊於大壩逐賊於城下日奪西兵之魄而禡二酋之魂其狂謀詭計必料官兵追逐乃設伏誘我狡謀業已勘破輕騎前後夾擊一鼓俘馘無遺而崇明父子不顧分道各竄所謂狼奔獸逸者惜乎陰霧晦冥尚假其一息之喘耳此皆天朝之威足以振揚我武矣第銀米俱乏三軍枵腹屢

經鏖戰恐致脫巾不得不哀懇於本部院也又據范繼道報稱部將羅尚文領兵乘夜衝殺賊兵驚逃跌死深溝極多獲賊馬四匹鞍轡俱全割級一顆槍十枝等因又據仁合路監紀僉事盧安世塘報親督將官張奏凱王正相等奉令分守鄢家渡與賊對敵斬苗功三顆生擒二名供稱西賊與酋於十月十三日已暗渡上赤水矣見劄四大營於對河者弄坡頂卑職自抵鄢渡各兵無米全憑各處高粱粟稗度日今且尋盡等情又據帶管遵義監紀叅政閔夢得塘報據綦路監紀同知商良

弼報據副將侯良柱發將官蕭有忠探報西賊發兵救  
援奢酋由崖下出龍塲於十月初七日有忠等查的先  
伏兵於崖寨小河以候次早兵果至砲響爲號四下殺  
出降將先汝受斬僞守備阿位李長榮斬僞千總抹者  
侯國禎斬抹賽阿保各將親斬四十顆墜崖死者不計  
得馬四匹槍刀三十餘件又據監紀真綬路推官李必  
達報稱十月十六日申時准叅將陳一龍塘報分部將  
王尚明傳元勲等往遵義中庄等處合黔師龍秦二副  
將剿安逆賊六萬直衝清潭水秦將親督三軍二職率

兵向前殺死西賊極多斬功三百餘顆生擒阿烏迷第  
五子阿祿元奪獲戰馬器械無筭各等因塘報到臣據  
此先是據報西賊添兵七十餘營同蘭酋拒守河口聲  
言欲渡攻永截糧臣疏報後卽會按臣嚴檄各道鎮將  
如賊果渡卽便互相通報併力擒捉以完蜀局固守城  
寨務保萬全及令建武瀘衛大振兵威毋容滋蔓處處  
截殺去後於時按臣移住叙府檄將催兵亦與臣時時  
計議且日擊餉匱兵饑急捐銀一千兩移臣以備賞需  
今據前因除動支餉銀五百兩折充花紅獎賞有功文

武將吏訖該臣看得逆酋父子窮窘已甚寄命鄰苗旣以辱齒乞憐復以盡剿相嚇於是水西遂發重兵於河口不惟顧奢兼以自衛若鎮烏等苗與夫受降之苗一聞水西助虐狐兔情深自相陰助窺我餉乏欲圖大逞幸藉皇上威靈諸將用命大壩一路三次大勝官兵在永寧者一戰殺其先鋒再追殲其伏賊惜大霧陰霾致使逆酋逃遁是戰也道鎮協力將校血戰業已奪四夸觀望之氣矣第永寧原非蜀地二賊又在鄰界欲守則師老財匱終爲不結之局欲進則路遠籌深必難爲無

米之炊且聞黔師已聚勢不容緩所需楚餉自領過七萬兩之外奉旨差官勤催尚未解至道鎮屢報無糧各兵饑斃不得已量議加派又奉有不可輕議之旨斯時量沙無措點石不變臣憂心如焚形消病劇於拜疏後微行藩司量於未殘州縣一面權宜酌徵以救目前之急俟楚餉解到卽止或候事寧抵充正項稍俟餉足卽發各道鎮親臨營伍渡河擒賊外所有前項功次理合塘報伏乞勅下兵部案候事寧一體查叙施行爲此具本謹題請旨天啓三年閏十月二十二日上奉聖旨兵

部知道

議處貪殘庸劣有司疏

題爲議處貪殘庸劣有司以安地方事臣以督兵久駐江干凡民間疾苦廬舍蕭條之狀傷心而慘目無計可措所賴各有司扶傷救死培養生息汲汲然猶恐不逮而況有不務噢咻專圖剝嗜與夫政權旁落狐鼠橫行者尚可容於民上乎臣廉其罪狀彰著者有四人焉謹會同巡按四川監察御史溫臯謨爲皇上陳之訪得綿州知州崔含輝賦性簡傲立志卑污嚴刑慘於炮烙嗜利密於秋毫跡其行事大有可駭者一本官用棗木棒



行刑動責六七十後改用大竹板每塊重七斤夾棍以鐵心枷用三百斤又有弔髮刮肋烙鐵皮鞭油捻熏鼻等非刑一商稅奉旨停免本官仍行橫徵上下商船每隻稅一兩仍設吏於下流查對羸馱每隻稅三分入店者責令店戶報稅方許發賣打死漏稅商人王二吳喜李發三田仰坡辛四官等多命又差撥吏嚴畏充巡攔頭目徒棍曹忠梁杲受楊光泰放關吏快華陽啓金守第等證一城郭鄉鎮設立市稅每處用一巡攔凡每遇集期斗一張抽稅一錢一分經紀等秤一把稅銀七分

內一案稅銀六分酒一鋪稅銀一錢每月得銀二三百兩收稅吏華陽啓趙綱證一徵收錢糧明加一暗加二欠一兩以上者責五十欠三五錢者責四十仍各罰罪打死排年收頭夏時榮鄭可乾邵臣阮榮張師項清阮坤葉有梅張汝舟尚謂起唐大羅瑞胡朱貴等多命一攢造過糧每買價一百兩明索紅錢四兩暗索二兩不用布政司號票止用私刻關防任從侵匿減一丁索銀十兩無銀者加添其計得銀二三千兩過送吏胡守恭亦乘機索銀二百餘兩審丁非刑打死劉志羅泗李正

富王應和等多命一派運叙府兵餉計夫一千二百五十名每名索銀二錢剩夫一百三十七名每名勒折銀三兩共得銀六七百餘兩一立吏陳友義爲監緣凡州內養蠶者俱要報稅但養二三十斤者報一二千斤索騙王大禮梁選魏雲四劉道遠王大桂朱鳳胡葵等銀二三百兩打死蠶婦李氏一勒索各吏見面錢見叅六兩候缺四兩快手二兩皂隸一兩計得銀六七百兩打死吏杜仕寵快手甘俸林揭正芳彭加貴等多命一聽吏房吏王言譖搯拏新納吏農姚天策等不經州起文

每名罰銀五兩米十石共二百三十二名計得銀千餘兩嚴畏監收非刑追比打死吏葉鳳儀等命一撥吏吳鼎黃忠赤等查筭庫吏錢糧自三十六年起勒要節年庫吏王之臣李天桂李含春嚴畏等每名罰銀五十兩米三十石酷索李來林銀五百兩止完二百兩本吏脫逃仍拘妻鄧氏變價一候缺吏呼喚不到差用不前各責三十板罰銀二十兩前後共罰過吏楊耀周仕祿何龍翔等銀六百餘兩一本州團練操兵三百名每名月該工食銀九錢止給八錢每季扣銀九十兩皂快查點

不到盡革不補用白役勾攝害人將空役工食侵扣入  
已計一百五十餘兩符汝敬李忠等證一用取行戶羅  
文貢等段正恠其領價將尺頭盡行搗碎給賞孤老仍  
復夾打枷號以致斃命各行爲之罷市其往省下程小  
飯等費俱發墨票取辦毫不給價暗登循環扣剋入已  
趙綱余朝元等證一詞訟令權吏李炳劉炳章先向原  
被告索賄無賄者搖頭爲號重刑拷打打死王應陽鄭  
士明等多命一行牌僧官月現查通州一百八十寺觀  
僧道俱要上銀領牒每名索銀六兩計得銀六百餘兩

打死僧人如雲等命一訪知醫官孫明揚家富將吏目捕務奪委仍委其惡叔孫榮宗爲外巡令逐日按尋街市小事申報罰罪索得謝禮六十兩後衙待酒一丁祭文廟及各壇豬羊盡令折乾止借用屠戶豬羊通學耻笑一戶房吏鍾應朋稟領金貢士路費責三十板罰銀二十四兩本吏證一嗔教官不遞手本拏學役何富打五十板登時死一免扮春飾差吏李炳逐件折乾三十六行至戲子倡妓盡行科派因辦納遲緩將妓女梅寶貝夾死暑天往省嫌轎夫汗氣將夫楊佐梁進登時四

十打死拋屍於德陽縣地方不許收埋一過馬泗渡噏  
船上不張彩將渡夫彭加樓尹廷立登時五十板打死  
一庫子彭松因心紅不足登時責四十卽死一打造錫  
硯不如意將錫匠四名各責三十登時死二命工吏李  
榮聯證一發銀七十兩要傾錠一百兩將銀匠鄭董先  
打死一帶徵利松二衛屯糧加四徵收打死屯軍沈加  
爵余守張安二周興四等多命一本官在衙與父嚷罵  
將父擔拽仆地噏蓋屋匠朱文清窺見將清夾二夾棍  
打三十板收監欲置之死因天雨牆圯逃匿本匠見在

證一借欠京債甚多山西客人王旌等索償紛紛煩言  
噴噴本官具揭明言於司道此一臣者官箴大壞民怨  
滿盈多命含冤道路以目若縱之滿載歸休何以懲前  
儆後臣已會按臣檄行按察司羈候聽勘應照貪酷例  
革職爲民仍乞勅下嚴行巡按御史究問追贓正罪者  
也又訪得彭山縣知縣焦三移恣睢不檢骯髒自雄妄  
殺殊見周章縱子全無法紀一本官天啓元年十一月  
內自本州回縣南門民兵周得雲一銃不響怒責三十  
次日身死艾言等證一因奢酋圍城將家眷移住差頭



毛應聘鄉莊寄居本官長子遂與聘妻何氏姦濃天啓  
三年三月內又令門子王應舉復透何氏進衙潛歇被  
何氏偷出銀二十七兩仍令門子稟知典史出票追取  
前銀典史周嘉賓謚一乘酋叛亂有不知名姓客人經  
過彭山撞遇差頭余永福假威盤詰求索未遂誣係奢  
賊把連赴縣當堂拶出銀七十兩水絲三十斤白攢  
絲二件不容分訴綁出梟首丟屍河中銀絲等物收進  
衙內任尚禮譚金章謚一上元節縱子沿街觀燈隨帶  
腹阜余永福查報馬戶樊騰親弟樊蛟送銀十兩攢絲

二正永福交送樊騰證一縣民周嘉貴因忿登時打死  
余加寬赴縣告理差腹阜唐汝闢行拘嘉貴將銀八十  
兩交與腹書安吉傳入後衙買賄本官長子不行檢驗  
黃正位等證一考試童生五名內俱先令直堂吏黃正  
位報知索銀二三十兩不等預先送訖方准前列劉餘  
黃正位證此一臣者性乖刑峻卽褫斥亦不爲過但賊  
跡未甚才力可驅應照浮躁例重加降處者也又訪得  
加銜成都府同知管中江縣事鍾文煥中無主宰事每  
糊塗太阿以倒持而旁落群小因積玩而生奸一本官

專聽吏書盛訓楊應明文選吳繼撥置人稱一堂五知  
縣聽吏盛訓等卒稟革去五里收頭每年錢糧八千餘  
兩委四人收支私造大等加一徵收計得銀八百兩有  
餘里長青思志證一將協濟建寧驛銀五十六兩扣剋  
二年共銀一百一十二兩陷驛倒站余懷德證一支給  
扛夫一百八十名每名年該工食銀七兩二錢每名扣  
銀一兩二年共得三百餘兩吳繼孔證一運餉米夫二  
百名每名索過堂銀五錢方給米起運共得銀一百兩  
青思志證一本縣額設馬四十二匹每匹歲額工食三

十兩本官聽盛訓撥置傾銷低銀支給多行扣剋以致馬戶逃走倒站王遠證一本官少京債有心腹盛訓夏宗舜等稟重犯盛如栢積有家財借銀三百兩還債本犯不與登時取出打死申報監故盛如松證一本官支給皂快一百八十名每名工食扣剋或一兩或五錢共得一百餘兩吳繼孔胡現證一本官徵收鹽課八百兩每兩加二秤收二年共得銀三百餘兩胡金甫證一本官有總里幸安包收錢糧打死余三苟告縣賄糾楊應明送銀二百兩寢案黃朝亨證此一臣者才本綿薄政

復情竄但各賊多被剋於群奸而本官亦無苛政所當以不及例量行降調者也又訪得壁山縣知縣尚登雲病體纏綿才華庸闇刁疲漫無整頓衙役盡肆縱橫一本官所任之地原係窮僻卽奢酋作難該縣尙未遭大夥衝突祇緣官無勵氣以致民無固志因而失陷城池賊見地陋民貧三日卽退縣官袖手而已一兵事惟糧餉所關原非細故該縣以二豎頻侵征輸獨緩缺夫缺餉率多悞事屢經道府督催漠然無以爲應一該縣馬戶因軍務旁午輟差倒站累里甲包當仍拴同差役考

索里甲希圖倍貼再充通縣民劉遐二等赴上告言卽  
投府監候審馬戶厚賄差役本官聽其瞞稟差兵圍屋  
抄提仍信妄呈申稱劉遐二拒捕傷兵不知遐二久在  
府監矣偏聽長奸幾陷良民之命此一臣者性原寬厚  
又復多病以致群奸縱肆事雖廢弛囊無厚利所當量  
改敎職以俟改圖者也伏乞勅下吏部再加查議上請  
如果臣等所言不謬將知州崔含輝照貪酷例革職爲  
民乃行巡按御史究問追賊正罪知縣焦三移鍾文焰  
尚登雲分別議處遺下各員缺急爲銓補嚴限前來任

事施行庶官邪知警而民生有攸賴矣爲此具本謹題  
請旨天啓三年閏十月二十二日上奉聖旨吏部知道

揭報大壩功次

爲塘報事先是奢寅父子糾同水西復攻永寧我兵屢戰殺敗分道遁回龍場職已檄令道鎮勒兵追拏又恐糧運愆滯另委巡西道叅政吳光義住劄納谿督理安綿道副使謝渭料理水潦外溫御史又捐銀一千兩前來懸賞隨據監紀副使李仙品僉事劉可訓知府鄭朝棟總兵李維新等塘報水藺復結皆因水潦大壩卜昏白拘林等處苗賊誘引助惡今又欲糾普黑之苗爲害若不持清終爲糧運後患於是本鎮發叅將林兆鼎張



邦紘鄧懋官秦翼明秦拱明將官周良材孔全斌李仙  
德李棲鳳張令等掃清各洞固本鎮一面發兵臨河布  
陣擒賊天啓三年閏十月十六日起至十一月二十五  
日止續據林兆鼎等報稱各統兵攻打落卜黑林魚兜  
河高寨落石寨等處當陣斬獲僞叅將阿垠僞都司阿  
謹賊目益黨阿賽賊首阿五首級五顆苗級六百八十  
六顆火煙烙死二百餘賊生擒男婦二百四十七名口  
槍刀弩甲花衣苗氈三十六件牛馬七十五隻匹各將  
卽抵赤水上下河口鄢渡劄營搭橋探得兩酋見大兵

逼急又見黔兵與遵義各將官合哨窮促至。窘崇明同扶國禎朱國政等扼險守渡。奢寅奔逃水西求援等情。本月十七日據監紀遵義路叅政閔夢得副使侯國分紀同知商良弼推官李必達知州朱毅臣等塘報據叅將陳一龍遊擊侯良校等報稱西賊莫得官統兵二十三營助奢寅攻永大敗逃回。奢富同督苗羿偽都督扁老虎普初等欲來包截官兵見劉白頭圍等情。當令副將趙文進降將楊柳及鄧朝用等分定四路暗伏本官統兵合擊。良柱親斬偽叅將者罵首級一顆。部斬偽都

司阿仲魁抹賽阿一重大頭目王興等首級四顆苗級一百八顆生擒僞守備冷齋阿東弟哥等男婦三十一名口墜崖死者不計槍刀無筭又據羅安良等報於十九日連夜統兵渡江直抵奢寅與僞都司扶反兒營正三更奮勇殺入加銜指揮羅安髦斬驍目趙汝受追至木芒寨斬獲抹賽趙汝真等首級一十八顆鞍馬盔甲刀槍僞牌器械無數又據叅將陳一龍將官戴來鳳報稱奢寅委苗頭長經歷阿忠督苗至板山立寨撥發將官余興高等統兵衝殺降苗阿一釵生擒賊目阿粗陣

斬僞叅將阿忠首級一顆長經歷着箭奔回營中我兵  
周圍放火將長經歷阿角粗阿戶等苗羿數百人馬一  
併燬盡又據該道報據陳一龍塘報二首見永路攻急  
奔逃水西見在合賊縱橫阿烏逃搭黃高招安邦彥擠  
紅高招奢寅搭藍高招自二十一起遂日攻打陳戴  
二將奉蜀黔二院嚴檄上緊援剿今賊欲斷黔餉道加  
銜遊擊楊通需奉本部院牌令見爲黔師前鋒本道已  
催侯良柱趙文進趙國璽游鄭等兵合陳戴援剿請乞  
發餉催兵等因又據商冉二同知陳一龍戴來鳳中軍

蘇迪各報二十八日川黔兵大勝斬功甚多內一大頭  
目驗係阿烏述長子首級陣獲大馬一匹金銀刀一把  
又據陳一龍報據楊通需加銜叅將李之信與邢彥奢  
寅大戰斬賊首百餘級奪獲鞍馬百匹奢寅大敗走回  
龍場又據仁合路監紀僉事盧安世塘報閏十月二十  
六日差前鋒加銜叅將張泰凱加銜都司聶之宇督兵  
過落紅河偵探與偽總兵阿金帶賊兵數百于樂川撞  
殺加銜遊擊吳攀龍等斬賊級十四顆弩刀槍十九件  
藥箭四筒絮三床又報寅賊援西敗回損失數多等情

又據盧僉事塘報加銜遊擊晏可成統兵攻打追至尖山馬蝗等處斬功四十三顆招降漢苗男婦四百一十二名口羅華發袁應朝招撫鹽井壩降民車應舉等男婦一百一十三名口逆寅一面修整水頭固點賞衝鋒有王月憲等約羅用家丁男婦一百五十房又據巡下南叅政王世仁塘報舒廷彩招降民游三游五王宗龍等犒賞於十一月初六日將奢寅坐鎮官劉文虎父劉旺殺死斬首級三顆招順民一百房各等情塘報到職據此查得兵分五路業已大震兩省夾擊酋正奔波此

實犁庭掃穴執俘奏凱之機矣除卽刻定師期切責五  
路將吏一齊進取龍場擒酋完局外前項功次合行塘  
報天啓三年十一月二十五日揭報兵部

飛報擒獲首兇疏

題爲飛報擒獲首兇以慰聖懷事本年十一月二十九日據總兵官李維新監軍副使李仙品僉事劉可訓塘報奉令剋期五路進兵悉照指授道里日期方略行事去後本月二十五日申時據中軍坐營領兵將領等官飛報降將胡世孝廖應選等至營報稱遵奉兩院道將諭帖間計商同賊目焦崇智傅紀符國清廖受謨余六羅向宸羅用沈奇孝宋朝臣曹于海周邦臣史都者佐阿寅阿龍羅文元焦現龍謝顯貴謝君寵等於王繼宗



家歃血擒酋獻功贖罪被李遠達等透露崇明父子擁  
衆中傷衝圍而逃廖應選等生擒李遠達廖應聘斬僞  
監軍李惟鼎楊選等生擒僞都督蔡金貴王繼宗等共  
擒崇明妻安氏僞總兵夜日官兒仍在抄山追捕等情  
十二月初一日又據遵義道副使侯國飛報准加銜副  
將侯良柱報稱屢奉密策又發家丁暗與王繼宗等定  
約大購懸賞於十一月二十一日提兵殺入龍場鏖戰  
自寅至申當陣生擒首兇奢崇明僞軍師蔡金貴并逆  
妻安氏斬僞相僞將首級千餘鞍馬槍刀無筭其逆寅

中二槍扶馬而逃扶國禎亦中箭逃等官兵見在搽拏等情又據該道報准侯副將文稱前報倉皇今親審各目供報與王繼宗面質各僞將輸服無言仍有未獲頭目見在搽捕但奢崇明中藥箭命在須臾斬獲功級尚未盡審至於奢富奢宏走入崖下見在發兵擒剿計開審明逆犯大梁國僞太上皇帝奢崇明僞皇太婆安氏僞閣老蔡金貴僞總經略李廷僞都督王承恩僞開國軍師左丞相張向極僞相府何以清猱獬頭僞封司紀正總督張伸脚阻官僞兵部尚書兼總督事法荅官僞

兵部侍郎葉木官僞總兵樂烘官同日又據仁合路監軍道僉事盧安世塘報相同先是二逆走險負嵎依鄰衝突臣同按臣已切責五路道將酌定道路剋期進取密發諭帖劄付多方間誘連會黔中及時牽制如期夾擊務遵明旨速擒二逆廓清巢穴一面報部外今據前因該臣看得逆賊奢崇明父子自遁入龍場狡詐百出時而糾鄰四面衝突時而入穴莫可端倪將謂有險可憑有鄰可助欲老我師乘間狂逞茲者仰仗皇威將吏僇力大兵甫入半就擒誅逆寅雖未卽獲諒亦難逃天

綱今據各路塘報相同似無虛假除嚴促五路官兵星火追捕逆寅與各逋目廓清巢穴策應黔師行事併俟道將解到諸犯質審獻俘獲功員役查實的係何路何人另叙外合先飛報以慰聖懷爲此具本謹具題知天啟三年十二月初一日上奉聖旨兇酋奢崇明俱已擒獲深可嘉尚逆寅及各逋目催兵逮捕務期蕩平督臣朱爕元調度勤勞其監軍有功將士俱候獻俘一體優叙兵部知道

縣令給由疏

題爲遵例考覈給由官員事據四川布政使司呈奉臣  
批據綦江縣申准本縣知縣鄒昌魯關稱見年三十七  
歲湖廣荊州府公安縣人由舉人萬曆四十七年十二  
月內除授今職四十八年四月二十三日到任扣該天  
啓三年三月二十二日連閏實歷俸三十六箇月三年  
任滿例應給由照詳奉批仰布政司查報奉此又蒙巡  
按四川監察張御史批同前事蒙批布政司查報蒙此  
行准按察司守巡鹽法等道各咨牒回稱查得本官委

於前項年月日期到任歷俸考滿任內徵收錢糧鹽課  
清勾軍伍積貯稻穀五事實政俱已足額修舉貯穀碾  
充軍餉委官查盤無異應准給由開具經獎稱職詞語  
起送到臣卷查先准吏部咨爲酌議考課之法以肅吏  
治事內開今後府州縣正官給由免其赴京聽撫按官  
從公考覈賢否具奏先令就彼復職管事牌冊差人齎  
繳其稱職經薦應得誥勅命者照例請給其平常不稱  
職者部院會同酌處又准吏部咨爲酌時宜陳愚見等  
事內開遇有方面有司官考滿從公考覈據實直書分

別稱職平常不稱職三等填註考語具題給由以憑本部議處又准都察院咨爲治平要務急在保民等事內開省直撫按遇郡縣各官考滿總將三六九年修舉過五事實政覈實造冊定稱職平常不稱職之差等另報部院各等因俱題奉欽依移咨通行在卷今據前因該臣會同巡按四川監察御史溫臯謨考覈得綦江縣知縣鄒昌魯材詣精明操持謹凜獨力以支危難嘔心而佐轉輸本官職業俱修考居稱職除批行令帶俸管事任內行過事蹟徑自造冊差人齎繳五事冊揭行令咨

送部院外理合具題伏乞勅下吏部將知縣鄒昌魯再加考覈酌議題覆施行爲此具本謹題請旨天啟三年十二月初一日上奉聖旨吏部知道



恭報蘭地善後機宜疏

題爲恭報蘭地情形與善後機宜仰祈聖裁以期安攘  
事先是臣切責五路將吏逼進龍場擒酋掃穴又慮酋  
黨懼死負固多方曉諭令其遵旨擒酋建功贖罪去後  
隨據各路道將塘報官兵大至龍場齊入得功有差降  
將胡世孝王繼宗等奉諭擒獲僞都督李遠達蔡金貴  
及奢崇明妻安氏等臣恐元兇未得老師匱財於是親  
抵戎行申嚴賞罰道經大洲江門永安永寧與詢問古  
蘭落紅大壩新寨太平瀘衛一帶皆膏腴地也衛雖隸

黔土實在蜀今二酋造逆奉旨征討臣與按臣并道將  
文武不惜軀命聚五路之師費三年之力以有今日雖  
二逆逃奔境外尚未獻俘而蘭州疆土業已廓清矣蜀  
自遵義郡縣以來不以得土爲利翻以養兵爲累故譚  
及改流輒多蹙額但二酋造逆滔天連年血戰僅而得  
之卽欲仍置宣撫將與之誰人乎况永寧一塊土西自  
建武東至遵義三面而環之賊欲動則無處不可闌出  
而我設防則二千里之遙最難照應譬如人腹心肘腋  
之間去一虎可復進一狼乎當聖祖時天造草昧西南

苗無不畏法故特就中設建衛所以通血脈徒用牙錯之義殊少彈壓之威浸尋至於二逆肆惡橫行已無天日在蜀以爲土司而寬其文網在黔以爲鄰苗而置之不較陰謀既久一朝驟發殺官戮民不啻刈草此亘古未有之變也尚可因循苟且不爲長久計哉以臣之愚叅之衆論咸謂當以赤水河爲界自河以東龍場一帶悉以與黔自河以西由赤水至永寧悉以還蜀就永寧城中設立道府與遵義建武互相犄角則呼吸相應聲勢聯絡用以彈壓諸苗保護內地計無善於此者若黔

省以爲祖制不肯更張則照黎平鎮遠之例蜀自郡縣  
黔仍衛所雖曰駢枝亦無不可臣不敢侈開疆之名以  
滋多事但審地勢參人情似不得不出於此惟聽廟堂  
之公議皇上之酌裁耳至於二酋業已無黨無家入險  
遠遁或旦暮擒縛或遲以歲月通未可知惟黔蜀唇齒  
利害相依屢據該省撫臣移會應援臣已發叅將林兆  
鼎提兵一萬殺衝羿子猱等關直入大方該撫臣卽  
留合營臣又行令總鎮李維新撥等事畢再發重兵應  
援外獨是蜀連年用兵公私俱匱庫藏括而又括錢糧

借而又借小民之仳倚未復膏血盡罄不戢自焚最爲  
可慮臣憂心如惓不能朝夕疆土旣清蚤宜確議一面  
設法將各兵漸撤以省民力臣謹會同廵按四川監察  
御史溫臯謨合詞上請伏乞皇上俯賜裁定勅部院會  
集九卿科道從長確議覆請轉行臣等次第料理奏報  
庶西南苗羿之地奠安於萬萬年矣爲此具本謹題請  
旨天啓四年正月初九日上奉聖旨該部便看了來說

## 塘報功次疏

題爲塘報功次事天啓三年十一月二十九日據鎮道  
報據中軍坐營將領等官塘報降將胡世孝廖應選等  
遵奉部院諭帖商同賊目焦崇智傅紀符國清廖受謨  
余六羅向宸羅用沈奇孝宋朝臣曹于海周邦臣史都  
者佐阿寅阿龍羅文元焦現龍謝顯貴謝君寵等於王  
繼宗家歃血擒酋獻功贖罪被李遠達等透露崇明父  
子擁衆中傷衝圍而逃廖應選等生擒李遠達廖應聘  
斬僞監軍李惟鼎楊選等生擒僞都督蔡金貴王繼宗

等共擒崇明妻安氏僞總兵夜目官兒仍在揔捕等情  
十二月初一日又據遵義道副使侯國飛報據遊擊侯  
良柱報稱屢奉密策暗與王繼宗等定約大購懸賞於  
十一月二十一日提兵殺入龍場鏖戰自寅至申當陣  
生擒首兇奢崇明僞軍師蔡金貴并首妻安氏斬僞將  
僞相首級千餘鞍馬槍刀無筭其逆寅中二槍扶馬而  
逃符國禎亦中箭逃等情又據該道報准侯良柱文  
稱前報倉皇今親審各目供報與王繼宗面質各僞將  
輸服無言未獲惡目見在揔捕但奢崇明中藥箭命在

須臾斬獲功次尚未盡審至於奢富奢宏走入崖下見  
發兵擒捉計開審明逆犯大梁國僞太上皇帝奢崇明  
僞皇太婆安氏僞閣老蔡金貴僞總經略李廷僞都督  
王承恩僞開國軍師左丞相張向極僞相府何以清猷  
羅頭僞封司紀正總督張伸脚阻官僞兵部尚書兼總  
督事法荅官僞兵部侍郎葉木官僞總兵樂烘官同口  
又據仁合路監軍道僉事盧安世塘報相同已經具疏  
續據遵義道稟稱當時倥偬止獲蔡金貴李遠達王承  
勲余五并首妻安氏等二逆中傷潛逃一時錯認誤報



原未拏獲崇明等情又據各路道將塘報賊見官兵大勢進逼賊黨奉諭立功贖罪生擒逆妻安氏大頭目李遠達蔡金貴等併斬李惟鼎首級來獻二逆負創奔逃莫可蹤跡臣以元兇未得於天啓三年十二月二十日直抵永寧監督六師申嚴賞格分別勸懲分佈各將士速進追賊外隨據總兵李維新監紀副使李仙品僉事劉可訓段師文胡平表知府鄭朝棟等官塘報大兵聚集龍場探得二逆逃入水西莫得官見居六卜又據報稱避匿水頭竹中竹瓦等園等本鎮奉本部院號令先

發援黔兵一萬責令加銜副將林兆鼎總統於十二月十五日自龍場起身前進水西一面追捕招撫莫得殺入大方會合黔師兵至水界羿子關苗羿守把難進矢石亂下是夜四鼓我兵銃砲齊發殺進關內斬功千餘跌崖死者無算據報逆寅同奢社輝母子俱在水頭一處逃躲兆鼎當蒙王軍門重賞花紅卽留大方犄角劄營其捕逃賊其各路奉令進剿者監紀僉事盧安世督仁合兵至叅政王世仁發加銜副將羅乾象督兵至遵義道監紀副使侯國發監紀同知商良弼推官李必達

知州朱毅臣及叅遊陳一龍侯良柱各統大兵至於路  
招降萬餘集會鄧懋官秦翼明秦拱明等逼近崖上崖  
下奢富奢崇德親執手本下坡叩見投降軟血情願追  
拏二逆道鎮各賞銀牌花紅勒令立限追捕具不致縱  
放二逆漏網甘結又據張令屈國忠招出者務阿翁者  
歹等三十三名到鎮投見犒賞取結本鎮同各道將發  
兵攻掾比洗法啓等處又報二逆於十二月十三日到  
崖下聽得苗目官兒要擒兩賊建功免死逆卽單騎隨  
帶小童不知去向降民王二吐稱二逆用銀二十兩雇

苗子二人引路入大箐要由小道逃入烏撒鎮雄此時  
陳侯二將兵抵崖上集會各將協心搜捕又據二道塘  
報發中峯營將官姚化民舒遐曹有才等兵追至黑苗  
寨與黑苗接殺部斬苗級三十顆生擒十四名又據叅  
將范繼道報稱招出苗羿數千隨即安插自鐮刀灣九  
股樹鎮西以至白崖層臺朱昌畢節百里各各貼然取  
有不致逆賊逃匿甘結又探二逆的在莫得地方匿藏  
又報樊虎同逆妾馬氏胡宗祿阿弟見在鎮雄邊界母  
享是實又據李總兵報稱發鄧懋官張學周雷鳴春劉

養鯤張洪烈李仁貴陳善治張得勝李仙景親丁李棲  
鵬李棲鶴等兵及仁合路張奏凱王正相并羅乾象統  
袁登等圍攻水頭固至二十二日准貴州王軍門差人  
約會本鎮住劄畢節扼七星關烏撒要路使兩省會合  
直攻逆匿之處二省之難旦暮可平等因又據烏撒府  
差生員楊文烈報稱擒獲首惡符國禎監禁鹽倉另解  
各等因塘報到臣除照明旨頒懸賞格激勵將吏併諭  
逆黨但能獲賊一體陞賞仍行鎮雄追捕馬氏胡宗祿  
樊虎阿弟等又令烏撒知府安效良起解符國禎到日

照格賞叙時按臣溫臯謨慮懸賞不敷特捐公費贖銀二千兩前來軍中犒賞鼓舞一時將吏歡騰無不爭先該臣看得葡境雖已廓清二逆蹤跡難定然六百里巢穴業已蕩平二三年巨寇頓爾解散二逆羽毛旣剪母妻不顧冒險窮奔苟延旦夕料惡貫之已盈而天網之難漏矣除躬同道鎮文武率衆撝擒嚴檄各土司把截要路擒拏報功仍酌量黔省機宜發兵應援兵數可汰者漸行檄汰外至於投降苗目量賞花紅加銜鼓舞建功之日准其安插復業安氏與李遠達蔡金貴等另行

獻俘外所有前項功次情形合先塘報伏乞勅下兵部  
一體優叙施行爲此具本謹題請旨天啓四年正月初  
九日上奉聖旨蘭巢已平逆首未獲著嚴督搃捕黔師  
失利前發援兵具見急鄰還遵新旨速行應援其鼓舞  
苗目安插復業等事聽便宜行該部知道

府官病休疏

題爲府官病勢日篤不能供職乞賜寬宥允放回籍調理事據四川布政使司呈奉臣批據保寧府通判許弘綸呈奉本部院批該保寧府知府張翼軫呈稱本職於天啓二年十二月內奉文取赴納谿等處征剿奢賊於天啓三年六月內偶染痰病請假回府調理經今三月愈見衰弱動履艱難服藥罔效乞賜寬宥早放回籍由詳奉批前聞該府病於永病於途以爲霍然久矣乃今尚纏綿耶仰安心藥餌痊可卽起視事不必輕言高尚



也奉此又蒙巡按溫御史批同前事蒙批該府從軍前  
與疾而返本院業聞之矣勞後稍休自當痊可况攝事  
固有人也仰且杜門靜攝勿得遽萌歸念仍候撫院批  
行繳蒙此遵依備關本官遵照批示調理間又准本官  
關稱本職自永寧染病回府卽令醫生用藥調理今近  
五月之上前疾愈作實難供職乞賜轉達俯准早得生  
還恩霑再造等因備關准此相應呈請合無准令知府  
張翼軫回籍養病俟疾痊起用等因由詳奉批該府著  
績軍前正切倚藉而屢以病請何也得無真有逼迫之

情卽仰布政司查報奉此該本司左布政使林宰看得  
該府爲郡素有聲稱軍前儘効勞勩祇緣積勞邁恙堅  
動浩然之念觀其屢次告休數月臥榻則病非假託是  
的業已拂衣應聽歸來合無准其致仕回籍以遂調攝  
等因呈詳到臣卷查先准吏部咨爲循職掌陳末議以  
仰禪聖治事該吏科給事中袁國臣題本部覆議以後  
請告官員在外仍令撫按官代奏等因題奉欽依移咨  
通行遵照外及查本官向委赴納路營中分理監紀招  
安朱昌狗鑽等洞一帶苗民殫心竭力勞苦備至祇緣

宿食瘴雨之鄉遂染顛躁狂怖之疾總兵官撤兵查點  
本官乃焚旗幟而歸臣切責回營料理而病體愈篤徑  
歸保寧日坐後堂呼僧呼道建醮禳災搬演戲劇憐然  
若醉更可異者以遺失所栽檟竹拏納級指揮馬穀痛  
加鞭朴當夜死於禁中其舉動之乖戾不意至此該臣  
會同巡按四川監察御史溫臯謨議照保寧府知府張  
真軫夙負才名已著保障之績忽爾病躁遂恣淫虐之  
刑蓋二豎侵尋滿腔顛鬱卽本官亦不自知者亟宜令  
其休致以免士民之驚疑者也惟是馬穀之死尚未申

明而本官病急業已離任亦可暫免深求俟其病痊另  
加酌議伏乞勅下吏部再加查議將知府張翼軫准令  
回籍調理病痊酌量功罪補用遺下員缺另行銓補嚴  
限任事施行爲此具本謹題請旨天啓四年正月初九  
日奉聖旨吏部知道

議處貪弁就便調補疏

題爲議處貪肆武弁亟調材將以固要地事蜀自構難以來用兵三年全不得見任各偏裨之力每遇檄調則申報地方警信百計支吾卽奉檄至於軍前無不涕泣漣洏亟求褫斥者蓋所養非所用時弊若此乃若有聞命不赴反恣漁獵如原任建南遊擊今陞遵義叅將石國勲者大可異焉本官奉遵義之命已幾二年屢檄之到任輒以地方多事候代爲詞及前督臣題補周基命而基命不赴臣乃改題黃承爵頂補前缺而本官猶不

肯赴央浼官民保留及今訪之則知本官倚官爲市貪利如蠅但知剝取以潤囊不顧尅苗而釀亂衆怨旣集法網難寬查據訪單一本官每營虛填兵士姓名冒支餉銀曾子富營內劉耀吳之奇王高黃三胡旺王忠陸名小高橋營內文朝等宋墩堡營內張錦等鳳山營內陳懷恩等鎮城羅高營內袁三傑等王應孝營內王用等松平關營內張鳳等名每季糧到全扣入已各營百總證一小高橋半站落腰觀音等營殺死千總劉啓隆百總羅勝擄殺男婦百餘姜州堡殺死兵目吳老八鄢

小狗高五等張官冲普龍瓦石魯塔麻龍伍處殺死綁  
擄人口牲畜不計其數擁兵尸位竟不救援仍捏文塘  
塞捕官蕭延勳等證一每年索取倉糧五百石致使倉  
官張崇估危一珍將荒屯虛串坐兌窮軍甚至打死陳  
椿保吳皮匠等李世武證一經歷祝應朝徵收商稅強  
要瓜分致本官十未報五復差旗手趙拱極阻攔客哨  
每客索銀三五兩不等又將脚戶監禁每駝索銀二錢  
馬承玉楊瑞七證一濫擬罪贖差役酷迫如生員父張  
念二張祥孫昇生員兄吳紹仁鄭宗彥等全不減納其

餘龔應鳳龔應洪游穩吳正道張元功鄔小二曹恩讓  
趙惟孝等苛罰動至數十兩被害人證一陳柱先名陳  
國柱投都司莊安世門下白晝抄劫監生何魯家財問  
擬重辟詐死漏網走入會川改名陳柱賄充中軍心腹  
用事受詞虐害軍民票取行戶怨聲載道倪端并軍民  
行戶證一陳客換金回滇宿馬承玉店內被聶尚文報  
知卽差本役鎖拏監禁指作奢酋奸細酷索黃金三十  
兩馬承玉證一聞報陞遵義叅將擇期卽於會川到任  
索取五所下程什物旗幟等項共折銀五十兩又於都



司到仕取建昌衛銀二十四兩危孟卓陳懽證一次賣  
廠木索商人蕭太衡孫智銀一百兩紅線色段十二疋  
杉板五十副文聯芳劉忠余宗義證一立會里州別濟  
爲里長索謝金手鐲二根重六兩銀八十兩馬四匹虎  
皮二張陳柱收余承卷董尚元證一捏故抄殺熟苗者  
鉄得馬一十五匹牛三十頭羊四百隻盛甲二副陳柱  
收許近賢文聯芳證一差千總雷起龍將鉄廠熟苗頭  
目阿得强拏監禁索取買命銀五十兩牛五十頭羊三  
十隻章其智羅高證一羅銀匠告黎溪州里長白承賢

殺死人命索取承賢黃牛一十五頭馬四匹銀三十兩  
又令攀紅卜苴里長刁應權索黃金三兩馬二匹孟承  
鸞陳雲登證一普轍讐殺張官冲苗人阿都先送四銀  
蹄馬一匹銀五十兩許令抄劫回寨又送土黃花嘴馬  
一匹古鞍一副陳柱過證一調土舍賢俊守城差嚴應  
洪索取見面錢不遂因令千總雷起龍陳柱等集兵教  
場殺牛盟誓縱兵毆辱指揮蕭延勳生員劉我賢搶掠  
生員許雲鳳軍人張理張守恩馬會等家財被害人證  
一苗人沙牛身死差千總張其智查點家財抄沒牛三

十頭馬二匹甲一副銀五十兩趙惟孝萬冬生殷證一  
準折窮民劉于岱男劉招孫杜榮女杜氏吳可觀媳婦  
馬大女等不顧部下子女槩收爲奴嚴應洪楊凌雲黎  
積德證一別糯與者鏹廝殺不能制服先索別糯燕色  
馬一匹銀五十兩黃牛五頭後索者鏹銀五兩海驢馬  
一匹任其互相殘害貽累地方趙勝過證該臣會同巡  
按四川監察御史溫臯謨叅照得原任建南遊擊今陞  
遵義叅將石國勲性本昏庸材多恣肆聞新命而不赴  
明是託故避難任奸役以作威惟務營私濶索據單所

臚列贓私種種大千國典若不行提到官究明何以懲貪橫而快公憤再照遵義叅將缺已三年率以加銜帶攝名位畢微終難彈壓況近日水寇披猖羽書接至尤須簡用得人查得原陞補廣西永寧叅將林兆鼎留征以來握兵二年搗蘭援黔皆能輕身先入功次載在勘案容另叙外合無加陞副總兵職銜管理遵義叅將事務伏乞勅下兵部再加查議如果臣言不謬覆請行巡按御史將石國勲行提到官嚴加究問具奏林兆鼎加銜副總填補前缺管理遵義叅將事務頒給應得勅書

劄付行臣轉行本官馳赴遵義料理任事施行爲此具  
本謹題請旨天啓四年二月初七日上奉聖旨兵部知  
道

辭銜疏

奏爲叨恩逾分抱病滋深乞准辭免卽賜休致以安愚  
分事臣樸樵散材罷駑下品謬承軍旅之寄素乏戡定  
之猷仰賴皇上威靈併各文武將吏死守血戰廓清疆  
土於今二年而元兇尚爾未獲臣之不材有明效矣方  
碌碌與病行間救過不暇忽於天啓四年正月十三日  
閱邸報該兵部題奉聖旨是川貴搗巢解圍各官勤勞  
日久功當先叙朱爕元加右都御史兼兵部左侍郎照  
舊總督欽此欽遵臣聞命自天驚惶無地竊惟憫勞而

加秩固皇上之盛心量力而就列尤臣下之常分以臣  
迂愚謬叨今官業已不勝過分况狗馬多病蒲柳先零  
痰火眩暈日增月劇年來屢屢陳乞萬非得已今自正  
月初六日感冒風寒發熱不汗奄奄床褥不能動履延  
醫劉加相等診視咸謂病根已深元氣盡損非謝事靜  
養決無生理臣微賤一身原不足惜但疆場重任倥偬  
紛紜偃卧廢閣成何事體不覺拊心自痛病勢益以沉  
重爲此披瀝悃誠冒昧懇請伏乞准臣辭免右都御史  
職銜卽准以原官休致別選才望大臣速行交代儻自

此倖延殘喘敢忘啗結臣無任激切祈懇戰慄待命之  
至爲此具本謹具奏聞伏候勅旨天啓四年二月初七  
日上奉聖旨叙功加恩已有成命宜卽祇受不必辭奢  
酉尚逋黔復告急還用心料理兵事以副委任該部知  
道



塘報功次疏

題爲塘報功次事據監紀副使李仙品謝渭僉事劉可  
訓知府鄭朝棟總兵李維新塘報據叅將林兆鼎報稱  
職奉令督兵至大方於天啓三年十二月二十一日奉  
貴州王軍門委職坐鎮海子等處二十二日大方與  
者大戰將職川兵撤至大方又於二十九日又令職洗  
剿海子掃清畢節一路職於天啓四年正月初三日發  
牌聯結四衛良家子弟四十餘洞避難軍民萬餘初五  
日職同叅遊冉世烘張倫石孟功譚正脩譚正常黃朝

臣等攻海子八堵等洞寨大戰斬苗級二百餘顆又據坐營劉宗良攻壩上洞斬功十顆據稱二逆逃避水頭莫得法啓正頂等固箐臣卽分道大發兵將攻洗擒拏續據鎮道報稱先發張令至太箐卽招降比茄官兒覺其游移果於初三日私逃水西屈國忠張仲等領兵趕至西地安撫斬訖比茄官兒并部苗一十二顆又於正月初八日起至十八日止本鎮會同監紀僉事盧安世知州朱毅臣及各路大小監紀分督各將張邦紘鄧懋官羅乾象劉養鯤侯良柱陳一龍袁鰲李棲鳳等分頭

圍洗法啓水頭莫得以翁勝等國約定前後一齊大進  
銃砲仰攻水頭大圍險關三重秦翼明鄧懋官秦拱明  
張令姚化民陳善策朱一龍等剋破夾戰部斬猓獍二  
十餘顆追崖跌死無數生擒猓獍二名俘獲男婦三十  
名口牛馬五十隻匹又攻莫得箐中二賊遺下長槍三  
百有餘降民口報二逆止四人四馬苗扮逃往鎮雄等  
情盧僉事一路報奉本部院嚴令撥剿明白卽抵水西  
擒賊依奉至遮勒竹中連日大戰斬功一百零二顆生  
擒苗羿十名俘獲男婦十二名口陣獲長刀弩箭長槍

共八十二件簑衣二領盛甲絮被其十一件牛馬二十  
一匹隻猪羊五隻馬鞍一副遵義道報據監紀同知商  
良弼報准侯良柱部斬裸羿首級八顆生擒逆寅親伯  
僞都督元帥者卧卽奢崇輝僞都督崇明親枝長經歷  
僞總兵奢史都僞叅將矮老虎賊奴陳元等四名跟隨  
崇明妻安氏繡女么妹小么妹阿三妻等七口僞丞相  
張向極妻王氏僞都督王承勲妻劉氏當陣督獲逆寅  
父子自披黑虎古甲一籠黑虎野豬皮古甲一籠九籠  
古甲二籠金絲紫攔逆酋自掛金長刀一口金鑲銀拖

泥長刀三口銀包左插小刀一把逆賊自騎戰馬十三  
匹二龍皮轡嵌銀馬鞍一副嵌銀轡頭一副陣獲槍弩  
七件又據監紀推官李必達報准陳一龍督部將王尚  
明等連日依會令哨攻圍大戰部斬猓獍苗羿三百一  
十五顆長刀標槍器械三十二件馬五匹戴來鳳督鍾  
成器奉令招出水西僞侍郎羅擢魁宋之臣焦林等六  
千餘戶驗明安插河梁莊又據遵義道報將降將王繼  
宗扶國清等八名家口降民二萬餘名口安插近地二  
月初三日據李總兵塘報奉臣紙牌仰職卽查十日以

來官兵所司何事曾否掃清畢節羿子一帶約會黔中夾攻火著擒酋明白以便減兵省食分布固守善後等因本職過河後再於正月二十四日發張令鄧懋官劉宗良秦翼明李仙德等各統兵前去客仲卧魚河料官崖羿子等關一帶擒搽二酋仍諭各將如黔兵在大方卽去會合夾攻完局若已退去卽爪探明白仍轉聽令據張令等擒獲西賊苗目阿么到職審據降苗報稱黔兵已退大方衆議黔兵旣已退去糧米不便難以深入撤兵回營聽令據此本職復回馬鈴諭令朱一龍周良

材李効忠等各率所部官兵把守河口又於二十八日  
分發張令同秦遵標桿等營官兵由谿廠出層臺至畢  
節與胡僉事林范二將會合俟有情形再報各等因塘  
報到臣據此該臣看得大兵摻洗固箐已出水西界上  
數日矣而二兇置遁無蹤且大方之師旣已撤退蜀兵  
亦不能再過畢節除將崇輝等及甲馬刀鞍發按察司  
聽候獻俘二賊臣已張示懸購烏鎮水西軍苗嚴拏其  
斬獲之功俱候另叙外理合塘報伏乞勅下兵部案候  
一體叙錄施行爲此具本謹題請旨天啓四年二月初

七日上奉聖旨





塘報功次疏

題爲塘報功次事臣准黔撫移咨煩發李總兵至畢節夾攻擒賊准此尋卽飛檄監紀道將乘勝渡河摻捕兩酋與黔夾攻業已咨復去後天啓四年二月十九日據監紀副使謝渭僉事劉可訓總兵李淮新塘報正月二十四日分令叅將張邦紘守馬鈴盧僉事同羅乾象守鄆渡本鎮親督各將過赤水駐師層臺會同僉事胡平表集議西目普窩阿體俱是水西大頭目各統苗萬餘若不剿除必爲我兵後患卽發叅將范繼道林兆鼎秦

翼明各督所部兵殺至畢節時普窩率苗正打南山洞將應襲劉相等數百人煙爍將死聞大兵銃砲解圍迺回二十六日分路攻打普窩大囤范繼道部下發中軍周繼先等攻南山小路楊時芳等進水田壩陳世本等進得勝堡胡僉事監本部兵從前路攻上林兆鼎督經歷張萬該雷安邦等出木犀關觀音橋包截五路奮勇圍打兩日范繼道部下斬功六十一顆牛馬十四隻匹將新舊衙門五十餘寨盡行燒燬明可道等斬普窩大頭目罵色夜扶阿里扶者等八名生擒大目卜目耶遮

二童者黑其意古俱解胡僉事斬訖二月初二日林范  
二將攻打阿體羅尚文生擒猓賊一名鞍馬一副斬功  
五十一顆追至烏撒界內抵朱昌洞大壩左所老塘黑  
張等洞彼住苗民何官劉華等軍屯俱來投見諭以朝  
廷恩威無不感服秦翼明督郭起柱等攻雞廠孫家鋪  
海子其斬功二十八顆生擒一名林兆鼎自正月二十  
六日起至二月初四日止攻普窩阿體二洞及阿五寨  
架納海子哨等處共斬功一百四十一顆刀槍標弩挨  
牌三十四件生擒男婦六名口牛馬二隻匹胡僉事會

合諸將議黔中音信不至又經深入三日之程糧餉難  
運初五日議留偏將陳士鳳朱三鳳揀兵四百餘名坐  
鎮海子聯各洞寨把截水西要道胡僉事同秦翼明張  
令先行林范二將斷後從小路殺回苗獠於層臺小道  
及閭王扁阻截范繼道兵陣斬六十一顆馬九匹又至  
五里溪後槽斬功六十二顆馬十二匹生擒六名得獲  
弩槍十七件陣獲尋甸府通判關防一顆摩尼所百戶  
印一顆俱全軍徐徐撤回赤水本鎮責令衆將各照信  
地把截理合塘報各等因到臣該臣看得大兵發過畢

節直抵烏撒海子攻破二固斬功纍纍第我兵深入而  
黔信不通久頓乏糧只得全軍而返除功次行監紀道  
紀錄印信類報解獻外理合塘報伏乞勅下兵部案候  
一體查叙施行爲此具本謹題請旨天啓四年二月二  
十八日上奉聖旨

黔師失利疏

題爲震鄰可虞固圉無措伏乞聖明速集廷議酌處兵食以救阡危事臣自天啓三年十二月十五日發叅將林兆鼎領偏裨陳善策周良材冉世烘仇可陟譚正脩等統兵一萬殺透羿子裸羅目得等關徑抵大方投見黔省撫臣王三善當蒙重賞命爲前部本月二十九日奉發洗通畢節等處天啓四年正月初五日行至海子攻打八搭寨塘報斬功百級臣入永寧分發大兵掃清各國箐間准黔撫移咨乞發李總兵速至畢節兩下夾

攻擒酋完局等因准此隨發總兵李維新僉事胡平表  
督兵二萬仍督同林兆鼎范繼道等直進畢節二次咨  
覆各將屢報獲功有差臣目擊蘭地業已廓清援黔已  
無餘力適叙瀘副使李仙品已承新命檄取安綿副使  
謝渭協同僉事劉可訓知府鄭朝棟等官分頭大張告  
示安置降苗乘時務農仍將生儒耆民犒賞鼓勵人心  
懽然俱來復業林兆鼎又護送副使張起鶚至於永城  
臣隨於正月二十四日仍出納谿至二月初一日准貴  
州督臣楊述中咨稱照得黔師直抵大方逆賊糾結烏

撤烏蒙苗衆邀截失利黔危岌岌事在然眉遵義比鄰  
亟應調取應援合咨貴部院煩檄遵義道速發精兵萬  
餘名選能將督領星馳前來應援事切同舟毋分畛域  
目擊倒懸以日爲歲同日又據遵義道塘報紛紛不一  
俱稱失利情真等因到臣爲照黔撫屢戰大捷直入大  
方水西已有垂滅之勢惟是狡酋僞爲聽撫以老我師  
其實四面埋伏邀阻歸路官兵苦戰乏糧其氣自沮雖  
經移會協攻乃黔師已於初三日徑從西溪撤退獬鬼  
盜起道路隔斷蜀兵在畢節聲息不通無可爲計今准



前咨除一面飛檄大將李維新等兵相機撤退卽刻差  
官馳赴遵義發監紀副使侯國督統遵桐見在官兵陳  
一龍戴來鳳鄧朝用趙文進等及一切偏裨揀選一萬  
應援外隨於二月十三日據總兵李維新胡僉事等塘  
報官兵前進畢節頗有斬獲黔兵久離大方無憑會合  
只得全師而歸等因該臣看得蘭土雖已廓清二逆尚  
無蹤影本擬草結一局用購擒酋而不意黔省大兵頓  
爾失利犬羊狂逞風鶴皆驚豈惟震鄰業且剝膚蜀中  
無米爲炊已經二年強弩之末不穿魯縞如臣庸愚更

難措處除行各道鎮將揀兵嚴加固守相機行事外理  
合疏聞伏乞勅下兵部作速將黔蜀事體從長酌議亟  
選將材措置兵餉以固危疆而救殘黎地方幸甚爲此  
具本謹題請旨天啓四年二月二十八日上奉聖旨

查叅貪穢有司疏

題爲查叅貪穢有司以奠生民事切照蜀中二逆未縛  
戎馬在郊五材並用誰能去兵維是撫恤瘡痍煦疾  
苦使僅存皮骨之民無意外摧剝之痛則維是二三有  
司守法奉公安靜不擾庶幾可爲閭閻寬旦夕之命而  
不意尙有因公濟私嗜利無厭藐功令爲虛文漫不自  
愛查訪旣的誼難隱默謹會巡按四川監察御史溫臯  
謨爲皇上陳之訪得夔州府通判李心得疎闇庸才斗  
筭小器任群奸爲心腹每事輒有叢神以培植作生涯

覓利已無遺孔查據單開一本官聽吏書孫承卿等稟  
稱乘楚缺鹽興販管利効勞卽給銀一百二十兩硃票  
封買私鹽四百包用紅船張旗假送公子撥夫運送湖  
廣彝陵等處發賣每百包賣銀四百兩共一千六百兩  
孫承卿并夫頭龐賽山船夫黃仰台證一署府事時有  
市民魏上林余澤等與販小鹽四百六十五包本官出  
票每包追取常例一兩各犯不服本官怒掣回原票盡  
將前銀入官令站夫民兵梢夫各具領狀照市價坐筭  
工食徑於府庫驛傳銀內扣銀九百兩入已庫吏張致

書于李啓蛟站夫彭友愛等證一客民吳臘生興販私  
鹽越關事犯本官得銀一百兩并鹽一載徑將本犯釋  
放其鹽給馬戶陳禮涂時太龐桂山等坐扣工食剋去  
驛傳銀二百兩陳禮等證一經管鹽茶每鹽一引除正  
稅外索商銀一錢每年約引二千有奇得銀二百餘兩  
每茶一道除正稅外每道索銀五釐每年約過茶二萬  
餘道得銀一百餘兩三載二項共得銀一千餘兩鹽茶  
行陳登雲并號簿證一奉文委收銅鉛錫杉板四項稅  
銀驗有嘉眉叙府票者加半徵收無者加倍徵收有稅

外仍罰百餘兩者又將一應貨船盡行阻留追上紅錢或五兩或三兩縱令家僮周道同積猾譚可學呂講謝永年等下河邏驗自九月內起至十二月止得過稅外勒索銀一千三百兩有奇李喬等并私收號簿證一署府印時有新進生員張安因業師劉登芳索求謝禮敵手毆死劉登宏告府安父張雲達屬吏劉紀將赤金二十八兩銀一百五十兩私送本官髡法主和通學共憤過銀吏并原告證一隨廳民兵原額六十名阜快十三名本官聽吏譚可學言將在市富民招充合役優免諸

差每名受酒價四兩共得銀二百九十餘兩收銀吏譚  
可學合役王仲時朱榮等證一署本府奉節縣印務通  
同收銀吏張廷諭將應解本省抵兌驛傳銀六百兩剋  
二百四十兩止將三百六十兩易換銅錢六百弔行票  
發縣兌給馬戶方天眷陳鵠等賞廷諭銀四兩楊茂年  
陳繼業并馬戶方天眷等證一奉節縣庫吏楊茂年侵  
欺半裁播餉共五百八十餘兩乘知縣張之仁革職本  
官委署縣印茂年將銀一百五十兩金髻一頂重二兩  
四錢古畫四軸託吏譚可學賄屬本官不行接印挾制

張知縣代賠滿數方纔臨縣曾守約江樺證一薛遊擊在夔駐劄用銀五十兩買腹吏譚可學庫吏楊茂年通稟本官稱兵無糧求借銀一千兩本官徑將府庫民糧六百兩縣庫裁省公費并茶馬罪銀四百兩私自借給後遊擊回籍一一補明本官復聽可學等將銀侵剋入已瞞詳司道開銷李起蛟梅應壽證一萬縣雲陽奉節三縣每年應上本府太平倉米共計二千一百餘石本官每石追扣餘米樣米耗米簞席米一斗每石折銀五錢每年得銀一百零五兩除本年改解軍餉外自萬曆



四十八年起至天啓二年止計銀三百二十餘兩倉書  
劉芳名解戶周之鳳等證一重慶商人戴查耳淮簿十  
七弔夾帶皇木二十餘根令工房吏胡拱北索上銀六  
十兩罪銀十兩八錢方將前木二根報官餘給主一委  
署達州印務陝西鹽商蘇敬販鹽至州發賣假以洗補  
鹽票監罰銀二百兩止完一百兩使六十兩放出一查  
經紀寇中元與鹽商通同作弊將伊子寇來賓酷夾監  
追銀一百五十兩止完八十兩中元無措投河方已一  
本官討京債客至州用圖書帖與州民李南廷熊以澤

謝南實劉時愛唐蛟等二十餘名每名借銀一百兩或  
送五十兩或二三十兩不等一王世英與王世奇因爭  
產業家財告赴本官世奇係監生送銀二百兩世英係  
生員送五十兩盡將祖產斷與世奇一生員黎芳聲被  
廩生呂諧鳴之害將諧鳴欺姦兒婦十惡等情揭赴本  
官將狀揭與直堂吏書張雷甫王愛倫私送與呂諧鳴  
得銀二百兩未行一操練民操二兵藉以汰革老弱每  
名索紅錢一兩五錢計百餘名一聽差頭文何龍黃奇  
稟清理城河馬道拆民房五百餘間每間罰銀三兩六

錢後見衆口多端止追得一半一五門民操二兵并州中行戶百姓周明勝等被董知州差頭劉起元之害連名赴吳按院處告准行州計贓千餘計條千款起元將金銀二百餘兩送本官遂含糊不究一鄭穩係州河渡夫鄭舉係皂隸兄弟素把持河道計贓數百本官假以巡茶出巡要人將弟兄監禁一月索銀八十兩釋放一清查八里塘堰有侵占者罰銀十兩八錢閉塞者罰三兩六錢塘堰計七十餘口一倚捕受詞本官多不坐堂全憑吏蘇時遇收進票拘不論曲直任意罰贖致民間

有啞鹿之稱三年約贖千兩蘇時遇并詞訟簿可審一署府將久貯庫銀四封共二百兩假充公費私盜入已庫書朱朝卿李啓蛟等可審一署府支放傳銀每百兩扣剋二十兩兌支各縣每百兩先上二十兩支兌共銀八千六十七兩共扣銀一千六百一十二兩兵房尹三聘熊起先并各夫馬可審一署府打造軍器將庫貯銅一千三百斤并倭鉛共造錢二十餘萬文費用又於各州縣取解物料或折價後於庫貯錢糧內又開銷一百四十九兩零虛冒入已工房吏李良楚百戶王德修可

審一因兵變假以盤詰奸細將過往船隻稽留每船索銀一兩方放兩年共得銀千餘兩巡江吏兵蘇時遇季可貴等可審一水漲流下大木二根值銀五百兩鋸爲材板裝賣荊州黃賓可審一童生黃潞因家丁自縊屍親具告生死不明得潞銀四十兩謝永年過送黃潞可審一署達州徵收錢糧每兩加二拆封時每百兩先兌去羨銀二十兩方纔會封如少收頭賠補元年收頭李曾元等可審一署奉節開徵錢糧每兩加二徵收得耗三百餘兩一署奉節奉文置造衣甲票取布戶李喬余

學詩等布疋淨花筭該價銀一百二十兩止給銅錢七十弔值時價四十二兩後開銷庫銀二百兩於內冒銀一百五十八兩各行戶梁之德等證一署奉節支給夫馬工食每銀一兩止發銅錢一千文每錢一千值銀六錢共發銀一百五十兩就中得銀六十兩夫馬戶龐桂山陳禮等證一署雲陽縣印開徵每兩加三民間鼓噪無人上納後廳吏譚自善稟過方纔加一徵收共收銀四千兩得羨銀四百兩以致百姓有賣官之謠二年收頭劉正富等證一署雲陽聞新官李知縣將到將本縣

富豪應納錢糧盡兌與各役工食兌支銀一兩先上銀三錢共兌銀七百餘兩得銀二百一十餘兩庫吏譚希禹可審一署雲陽因本府駁問賊情鍾良等一起得良銀一百五十兩魏太過證一署雲陽出示僉報天啓三年分馬戶無分有力無力於額外多報二十名每名賄釋放銀六兩共得銀一百二十兩馬戶李通等過證一署雲陽親赴雲安塲查追鹽課清筭鹽竈一百二十口每竈索紅銀三兩共得銀三百六十兩竈戶覃應舉證此一臣者屢經委署總張婪肆之聲倚辦軍需盡爲乾

沒之計防閑疎縱議論沸騰應照貪例革職爲民仍行  
提問追贓正法者也又訪得大邑縣知縣翁九陞性本  
粗豪事每虛誕徵收惟索火耗罔念脂膏宣淫頗著穢  
聲全無檢押查據訪單一本官收糧不用櫃頭任憑衙  
役王相子楊立敬嚴上欽文全等在庫秤收每兩明加  
一錢三分各役仍有加索及查盤官將至方喚鄉民暫  
頂收頭聽查仍將櫃內所收銀未及拆封者用布袋收  
寄入庫止將數十封或換原封或改銀數輕重參差不  
等其工於罔上類如此里排林雲華劉聘通等證一本



官審比排年花戶一名不到罰紙一刀折銀一兩七鄉  
共罰紙七百刀其問理詞訟不分曲直槩罰罪贖致民  
間遍貼歌謠云原告捨著被告哭你我都是三兩六莫  
道干證無相干箇箇都是一兩三齊心休去老翁告忍  
氣回家守田園楊承應魯可舉等證一本官日用布帛  
薪米魚肉一應物料俱用票濫取并不給價又加之差  
役需索方行收入指稱交際索取芽茶差腹阜徐應祥  
白忠等往霧中山中聖庵等處取過芽茶五百餘斤毫  
不給價差楊三才取虎皮十張索騙無厭獵戶將三才

打死止拘趙吉成等罰銀五十餘兩放免行戶高文玉  
田可慎庵僧常佑差阜陳子新等證一本官因奢酋兵  
變避居門子李承倖東莊與其妻及其父之妻妾姦淫  
賊退後令移居縣衙之後止隔一牆又將牆推倒引入  
衙內戀姦不絕惹得其母楊梅毒瘡又傳染承倖之妻  
互相纏綿本官瘡甚託言癰毒六房吏書人等斂金祈  
禳闔縣笑傳證一本官散給夫馬工食夫四十名每名  
扣銀六錢馬戶二十名每名扣銀二兩禁子舖渡看司  
等項工食全不給散有禁子上司訴狀本官拏回每人

打四十止給一兩八錢夫頭蔣貴芳馬戶葉奉全應神等證一本縣民兵及白役共三百餘名本官每名派取穀一石充作秋冬二季贖穀又稱接收家眷各役并夫馬派取四十兩幫貼葉奉馬德等證一本官報農民通縣共一百四十名每名索銀一兩免納自願上者止二三名報大造黃冊書手共四十二名每名索過堂紙一刀折銀一兩魯可舉王全等證一鄉民常燦納糧銀少羨銀六分罰穀二十四石闔縣股栗羨耗愈多黃冊書手劉朝勝等九人飛糧作弊告發止各罰銀三兩六錢

任其混亂通縣受害劉上書文全等證一土豪傅可應打死陳二問擬抵償送銀八十兩力爲辯脫土豪張聯芳活埋胡恆送銀一百兩求解脫罪強盜窩主余守益送銀七十兩許爲脫罪縣民劉慥劉煊爲抱養劉吉法繼嗣爭訟送銀二十兩潞紬二疋俱門子李承俸差頭馬成龍劉成化管庫王洪祿過送證土豪張朝用謀死廖迎舟活生倒埋姦占伊妻陳氏倚子張文薦爲本官腹書賄進銀二百兩竟行遮護今兩道駁行邛州檢審一本縣民周四爲爭水打死賈科月檢驗傷真托李承

偉父李三聘送銀五十兩又送舅爺李文攢絲四疋紋銀二十兩止斷給埋葬壓服了事縣民傅瑤爲討債毆死趙心蘭已行檢驗賄托腹役王相子魯可舉蕭應舉送銀一百兩聽買和免審此一官者外貌殊覺可觀初政亦博虛譽惟是計營阿堵遂任羣小以縱橫事好彌縫未免穢跡之敗露衆口交謫亟視非冤所當照不謹例冠帶閑住者也伏乞勅下吏部再加查議上請如果臣等所言不謬將通判李心得照貪例革職爲民仍行巡按御史提究追贓正法知縣翁九堃照不謹例冠帶

閑住遺下員缺急爲銓補嚴限前來任事庶貪邪知警  
而於遐陬荒徼不無補益矣爲此具本謹題請旨天啟  
四年二月二十八日上奉聖旨

申明誤報擒兇疏

題爲悞報擒兇謹再申明乞賜重褫以懲愚妄事天啓三年十二月初一日據監紀遵義道副使侯國報爲仰仗天威當陣擒獲元兇得收全捷事內開據遊擊加銜副總侯良桂報稱本職密行間諜與爲總兵王繼宗等先行定約於十一月二十一日殺入龍場鏖戰自寅至申當陣生擒元兇奢崇明僞軍師蔡金貴併逆婦賊屬斬僞丞相僞都督賊首千餘鞍馬槍刀無算其逆寅中二槍扶馬而逃等情到臣同日又據該道塘報據侯良

柱文云前報倉皇今親審各目供報與王繼宗面質各  
僞將輸服無言計開審明逆犯大梁國僞太上皇帝奢  
崇明僞皇太婆安氏併僞都督李遠達等臚列甚明臣  
遂據以具疏於十二月初二日差承差余彭龍齎報訖  
至初五日忽據總鎮李維新揭稱奢崇明已被創遁去  
遵義所報未真等語又據該道報據侯良柱塘報彼時  
當陣馬上接王繼宗報已挈獲崇明夫婦及諸惡目卑  
職心喜神狂卽刻飛報今查尚有可疑各等情到臣當  
差役飛追前疏去後隨據各路解到各犯臣一一面審



如崇明妻安氏已死懸屍城外各降民無不識以爲真  
及審所誤稱崇明者乃崇明堂兄奢崇輝面貌兇獍亦  
畧相似其實非也頃奉明旨下部臣跼地踏天舉止莫  
措雖良柱誤該道該道誤臣而臣不詳察遽溷天聽臣  
之罪更大矣除侯良柱臣已行按察司查究一面責令  
戴罪擒賊外副使侯國借手信傳法應併治至於臣臨  
戎二載未展寸籌元兇旣被倖脫奏報又復失真業犯  
明章何所逃罪伏乞勅下兵部覆議上請將副使侯國  
遊擊侯良柱併議究處將臣速賜重褫以爲虛妄不實

者戒庶賞罰明而法紀肅矣臣無任恐懼隕越待命之  
至爲此具本謹題請旨天啓四年二月二十八日上奉  
聖旨

勘明失陷縣令疏

題爲勘明失陷縣令論功示懲以明國法事據兵巡下  
川南道叅政王世仁呈奉臣紙牌催勘珙縣知縣鍾兆  
麟原任長寧縣署印主簿沈維翰失陷情罪作速勘明  
以憑具覆奉此已經轉行叙州府查勘間隨據鍾知縣  
呈稱珙縣與永寧最近自天啓元年九月奢賊發難錢  
任二土官占據長寧王抹賽統苗衝珙卑職督千總李  
一山率衆拒戰斬獲苗目華之林等三十八級報功在  
卷困守六箇月及崇明父子成都敗回糾兵數萬拚命

復逞二年四月初一日五路攻縣兵單糧乏難支家人  
鍾以福鍾以祿殺賊陣亡卑職幸護印而出初四日職  
督兵往衝建武歸身待罪五月二十日奉文統兵恢復  
琪縣卽管運糧米贖罪不敢辭勞當此奢賊猖獗之時  
卑職萬死一生往來殺敵止存氣魄今蒙行提伏乞憫  
念微勞備達寬宥等情該本府知府劉澤大看得琪縣  
地逼賊巢危如累卵逆酋以元年發難縣城失陷於二  
年四月初旬守閤六月戰經幾場賊燄乍張猶多斬級  
賊鋒大舉家人陣亡其護印走出奉文應援恢復之勞

已多而運餉建武日涉崎嶇其轉輸之力獨苦本官雖  
在顛沛之時百姓羣然依之筮仕一年遭此異變卽今  
蒙頭荆棘身傍虎狼該縣止本官一人勞苦可知也似  
有可原等因呈詳院道外又據珙縣通鄉士民傳有高  
甘繼林等連名訴爲保舉廉能以靖地方事竊照珙縣  
當閭鎮之衝唇齒相連元年九月內逆酋發難全賴鍾  
知縣募兵堵截斬獲多功不意二年四月初一日賊攻  
本縣縣官督兵力戰勢不能支縣城失守家人陣亡五  
月內統兵恢復本官獨力防守沿鄉招集兵勇把截堵

殺捐資雇募船夫轉運餉米建武接濟軍需招撫流離  
前後督兵接戰獲功七十餘顆但本縣以十室之邑當  
兩藪之衝全藉安攘撫綏之吏今蒙提勘伏乞軫念縣  
城爲墟防守正急俯賜備達緣情寬宥等情赴府天啓  
三年四月內奉本部院批據鍾知縣呈爲懇乞俯恤邊  
吏艱苦原情甦豁以冀後效事奉批琪縣設在賊衝初  
犯三次本官皆能堅守最後奢崇明五路之衆勢豈能  
抵律以失守誠不能辭而情固甚可原也仰府行令本  
官暫回縣管事候具題行繳奉此又蒙前按院張御史

批該本道呈琪縣知縣鍾兆麟等失陷城池照詳蒙批  
各官旣在行間討賊陷城之罪姑待事平之日另詳議  
奪可也繳等因批道案仰該府卽便行令鍾知縣遵照  
候事平之日另議蒙此俱經行令遵照訖續據該縣報  
稱回縣親至洞寨招撫八鄉流離在城鄉袁有智等一  
百七十家山路鄉曾俸雲等一百九十五家水路鄉彭  
孝等六十家波浪鄉上羅計下羅計落幹鄉岸鄉張勤  
等二百二十餘家各回耕業等因冊報到府又該本府  
看得知縣鍾兆麟自元年九月守至二年四月始之王

抹賽統賊脅降本官既能驅市人以斬巨魁繼而華之  
林窺伺虛實本官又能覺察剪其逆萌自謂狂鋒已摧  
彈丸可守尚以二千之衆救援洞底恢復長寧俘斬三  
十八級及奢賊潰圍回巢大張報復率數萬之賊五路  
來攻鍾知縣不度勢量力陳師犂頭坎以拒之柰衆寡  
不敵百總胡萬益家人鍾以福鍾以祿臨陣被殺而琪  
縣遂陷本官之不能嬰城死守也失於背城一戰非失  
於望風奔竄也況不匝月而恢復故疆無論崎嶇督餉  
之勞旋定安集之苦後功固可自贖卽其守經七月衝



犯三次皆能極力堵殺前功亦足追論矣況士民戀戀不捨嗷嗷代本官稱冤功過原可相準一青豈可掩功查勘已真當爲昭釋等因到道據此該本道王右叅政看得琪縣切近賊巢原無守備顧奢兵於元年九月入犯而該縣於次年四月失守是時本道在敘目擊其倉皇窮蹙勢不能支無奈我兵微食盡力不能顧也知縣鍾兆麟前此已多堵禦之功後此又有恢復之績二奴之陣亡可憫百姓之雲集堪稱不惟宜以情原似亦當以功準者也等因呈詳到臣案照先准吏部咨爲直糾

失陷城池官員以彰國法事該本部覆巡按四川監察御史張論題前事等因奉聖旨該部知道欽此爲照有備無患卽在平時猶宜繕卒乘修器具於以寇至之無日戒懼之不可以怠自奢酋發難距今七八月矣使其築城鑿池聚兵治器先聲足以奪人臨難敢於致死何至賊甫出巢民各奔命長寧旣復而再陷如署印主簿沈維翰其人哉又胡至相繼淪沒如知縣鍾兆麟其人哉卽其斗大孤城難當薦食之封豕而星散一旅誰遺解瓦之人心相習成風惟逃是計如江安之再陷知縣

陳達道已尤而效之矣若不懲前曷以警後旣經按臣  
諭劾前來相應覆請合候命下將署長寧縣主簿今陞  
經歷沈維翰琪縣知縣鍾兆麟江安縣知縣陳達道行  
彼處撫按拏問分別究治定限次年正月終具奏回銷  
遣下員缺另行銓補本部仍移撫按衙門遵照等因題  
奉聖旨是欽此又准刑部咨爲逃臣所在見告天威不  
伸非法伏乞聖明大奮乾斷亟正逃刑以儆人心以安  
宗社事該廣西道監察御史王遠宜題四川值奢變長  
寧再陷經歷沈維翰逃矣琪縣淪沒知縣鍾兆麟逃矣

安苗之變貴州湄潭知縣儲至謀甕安知縣時化各逃情罪等因緣由奉聖旨這各官失守逃奔法難輕貸都著行與該省撫按官嚴提究問正罪具奏該部知道欽此欽遵各移咨到臣隨經備行該道行提查勘去後續據該道詳請地方需人甚急應令各官戴罪立功事平另議由詳准前按臣會帖批行責令軍前立功外又據分守下川南道詳報原任宜賓縣主簿報陞神武衛署長寧縣印經歷沈維翰既復城池隨兵追賊有功有據沿鄉招撫把截堵殺買穀窮崖運米於蠻烟瘴雨極苦

備嘗攻破永寧本官肩理老君營收支糧餉多受暑毒  
染成重疾於天啓三年八月二十日身故據此又查原  
任江安縣知縣陳達道歷有恢復擒斬首惡多級仍於  
軍前討賊有功臣已會同按臣查勘明白會疏議陞遵  
義府推官員缺具題奉旨下部訖今據前因該臣會同  
巡按四川監察御史溫臯謨議照得城守失陷國典維  
嚴但棄之不守與戰敗而走情罪又覺不同琪縣知縣  
鍾兆麟以天啓元年八月履任九月構難當逆焰初張  
鄰封被陷之日尚能斬馘立威固守半載原與望風奔

潰者相去霄壤至二年四月賊以數萬衆五路齊攻本官不揣單弱率兵血戰將官旣沒二僕被殲本官計畫無復護印逃出臣隨將本官繫逮塘報訖當據道鎮各官因琪縣無官恐軍民逃散力請戴罪暫管縣事本官卽同大將楊愈懋領兵於五月二十日恢復縣治仍招撫流離督理糧運長建二路兵得宿飽本官之功果浮於過應合準抵但議功而不論罪非法之平今准按臣移會鍾知縣任淺遇變議將本官降俸一級仍留任事第查琪縣已推有知縣戴之一議留不便查比鄰慶符

縣雖補有知縣牟登元一向未任在籍值艱合無將本  
官降俸就近調補慶符縣仍於軍前效用庶功過相準  
懲勸不偏士民旣快攀轅之思而地方亦收得人之用  
矣相應具題伏乞勅下吏部再加查議覆請將鍾兆麟  
降俸一級填補慶符縣員缺候事寧之日敘功議復至  
於江安知縣陳達道業經勘明功浮於罪擬陞遵義府  
推官具題下部合候併覆原任主簿報陞  
沈維翰已在軍前物故無容再議理合一  
具本謹題請旨天啓四年二月二十八日